

三長物齋文略

序

古無所謂古文自六經外左國史漢莊騷皆古文也唐  
宋大家出古文始有專名神明變化極盡文人之能事  
爲後人所不能外明以制藝取士古文始不重故終明  
世二百餘年若茅鹿門唐荆川歸震川數人外能名家  
者不多概見我

朝文運炳昭古文之學復以大振侯朝宗魏冰叔汪鈍  
翁方望溪儲同人諸前輩卓卓可傳者奚啻數十人可  
謂盛矣近今士君子多好詩詞人刊一稿獨於古文幾  
成絕響焉閒有作者非以詭怪艱深自文鄙陋卽庸淺

庸俗不脫時文習氣求一可與講明者殊落落耳寧鄉  
黃虎癡先生挺不世之資肩斯文之任自其少時已有  
志於古文不屑屑以時藝鳴予嘗觀其所著書數十種  
考據論斷類有規矩剪裁善讀之亦皆古文也茲復取  
已刻諸書之未收者約爲文畧六卷將以付梓俾予檢  
校之予不知先生之文其於左國史漢莊騷以及唐宋  
明與我

朝諸名家爲何如也然觀其持論正大一衷至道而又  
不欲拾人餘唾每一落筆必有白出機軸處則凡所謂  
詭怪艱深庸淺庸俗者固絕無有矣學者深思而默會

之知其與古人之所以異又知其與古人之所以同將  
古文神明變化之法不絕如綫者猶可以尋緒而得之  
乎然則是編之存豈獨爲先生傳之不朽歟閱旣竟爲  
識數語於簡末云時

道光二十七年丁未歲嘉平月愚弟閻海林潤東拜撰

舊序

居嘗疑唐宋以來所稱考据家旁徵曲引  
直臣廷爭若老吏斷獄其所沈浸薰染於唐宋兩漢  
金殘石間者固應盎然占氣逼見須眉而其所著述或  
乃湊泊仳仳斤斤拘拘無能發其醇懿淵穆陸離光怪  
不可掩闕之氣而呻吟阻囁取韻於齒牙結響於脣吻  
以求一字一句之工者反得公然恃其楊腹以相詆傲  
夫取精多而用物宏伯有氏之鬼猶能爲厲況有胸中  
撐拄文字數千卷磅礴鬱積無所於發而甘令攙雜酒  
食糜腐於腸胃豈不惜哉天官書曰積錢之家其上有

氣然則飽詩書而氣不華非詩書之罪也氣不從詩書  
中出又安能爲華哉虎癡精攷据家藏金石文字數百  
種多前人所未有於時湖湘名士言博瞻者以虎癡爲  
首然獨不肯屑屑瘁瘁自埋沒於蟲魚豕亥之間以挫  
其鋒而損其銳而其所沈浸薰染於周秦兩漢蠶金殘  
石間者悉變爲醇懿淵穆光怪陸離不可掩闕之氣而  
沛然汨然一發之於文與詩嗟乎予病儉腹久矣譬如  
登山見鳥而無弓弩畢弋臨淵羨魚而無釣餌網罟罾  
笱來原見戰而無削格羅落罝罾之屬雖悵視終日有  
空手而返耳視虎癡家所有弓弩畢弋釣餌網罟罾笱

削格羅落冒采之屬雖然畢具而又能善其張弛時其  
機度擒縱指揮惟我所見此真足以極馳騁之樂收發  
之奇豈但不至拘牽攷据自損鋒芒而已是蓋將翹然  
獨出於唐宋諸攷据家別樹一幟而攷据家亦將倚是  
以張其軍無疑也虎癡有癡學八卷已就刊余嘗爲之  
序是集名三長物齋彙虎癡所蓄長物甚多金石文字  
其一也已自有記故不及

道光丙戌仲冬月友人諸城王金策書於長沙信美樓

三長物齋文略目錄

卷一

序十七首

卷二

序五首 記八首

卷三

記九首 說五首

卷四

跋七首 題二首 書後二首 頌四首  
贊一首 銘四首 傳一首 小傳一首



書事一首

卷五

書一首 壽序三首 告文二首 祭文七首

卷六

哀辭一首 行狀一首 墓表一首

墓誌銘二首 告示一首

附

三長物齋文略卷一

寧鄉黃本驥仲良著

李氏蒙求詳註序

著書難註書更難非遍讀世間書不能著書卽遍讀世間書猶不能註書世間書無盡而古書之流傳至今者有盡註古人書無一字無來處目中不盡見古人讀本必欲察及淵魚辨窮河豕曰某事出某書某事出某書條舉件繫如數家珍難矣至於排比典故較之服鄭註經裴應註史爲更難經主義理事可從畧史雖隸事其源易尋若夫擣撫四部之芳腴薈萃百家之玉屑易牙

知味難分釀蜜之華師曠審音莫別縑絃之繭自歐陽氏藝文類聚虞氏北堂書鈔以下無慮數十百家類皆作者自註尙不能銖兩無遺況以秦灰久冷魯壁重湮昔人所見求之今本往往闕如否則一事數說又復彼此踳駁註家命意原欲開導後學考核不精折衷未當適足以滋疑誤而已舊註之精當者以劉峻世說李善文選爲最然其詳畧去取已不無可議若近時坊本多以贗鼎求售全憑淺陋之見聞不顧本事之當否前人旣以譌傳譌後人復將錯就錯心師耳食相習成風無怪乎古書日註而日亡也間有鑒彼前車自居博雅者

雖涉躐稍富而體例未嚴芟蕪原文斷鶴脰以省紙板  
竄易字句添蛇足以欺愚蒙欲使疑皆可信轉教信亦  
成疑錄其纂輯之功不償妄作之過矣蒙求之名昉於  
周易著者數家以唐李瀚氏爲之祖包舉百代約以四  
言裁對既工音韻亦叶誠爲學者隸事之津梁我

朝採入全唐詩內石渠祕笈久已傳布藝林塾中惜無  
註本其徵引之博抉擇之精老師宿儒不能盡知所出  
將何以應童蒙之求乎是固非註不可而註之正不易  
易也閩中陳楓階先生以名孝廉出宰湘中繁區歷治  
所至有聲服政之餘輒與鉛槧從事著書等身而蒙求

註本尤爲精贍不獨爲前哲功臣後生良傳亦卽劉子駿所謂知蓄積善布施者也其書凡若干條總爲若干卷註中引書悉從原本檢出不以前後類書爲憑事雖習見寧詳無畧不肯增減一字欲使學者因註而見全文是以一書而備羣書之用也又恐原帙繁重難於覆校必詳載篇目使開卷了然體例之嚴可爲後來註書楷法非遍讀世間書者能如是乎先生宰永明鳩工付梓於二千里外郵書索序余主講五溪不克親與校讐之列挂名簡末固所甚願因述其註書之難如此抑余重有感焉太元得平子而方顯論衡遇中郎而始傳書

有顯晦自古已然今值

御定全唐文告成而先生適爲是註其亦唐賢著作光昌之會也夫

馮根公集序

代作

明季蔡忠烈公道憲死長沙之難郡中舉人馮根公一第同時被害附祀忠烈祠其事與宋末長沙守李忠節公節盡節於熊湘閣而郡人尹穀楊霆繼之就義之烈正相類故宋明二史以穀等附忠節傳以根公附忠烈傳當忠烈守危城時嘗夢忠節過訪及死卽祠於熊湘閣故址然則忠節忠烈之爲前後身無疑矣而根公豈

卽穀等後身耶穀等之死距今五百餘年其行事已不能詳考而根公則有却聘之書自弔之文代古之詩及貢閣吟譜諸作猶得於兵燹散佚之餘拾其煨燼以傳於是讀詠古詩而知其趨向讀贈答詩而知其交游讀紀事詩而知其畱心於時務讀自弔却聘諸文而知其早辦一死絕無低徊顧忌之心其生平著作尙有史發等書惜不能盡傳然其所傳者已可窺豹一斑嘗鼎一臠謂之根公全集可也卽謂之忠節忠烈及尹楊二子之英魂穀魄合爲一集亦無不可也然忠烈之集近卽鄧學開顯鶴已重刻矣而是集復出可以驗武城之得

人可以證田橫之感士是卽磁鍼珀芥氣類相感之故也耶是爲序

讀經心解序

代作

嘗攷漢儒斷獄類皆據經以定律竊謂經與律相表裏治申韓之學者非專治一經不知制律之本非兼治羣經不知變律之宜自藝文志以九流標目而儒法遂分專門然未有儒術不精而能以法家自命者也會稽沈雪翁法家之宗匠也挾其技以游於滇蜀吳楚間其在湖湘臬幕爲最久余自通籍後鞅掌風塵未遑歸里耳翁之名而不及一見今以致仕歸距翁之沒且廿年矣



友人以其遺著見示且乞一言以弁其端因檢閱讀經  
心解百餘條不立異以啟後生之疑不苟同以拾前人  
之藩其精審處有號爲通儒所不能到者獨於法家本  
旨絕無一語及之則又何也因思翁以讀律之心讀經  
卽以解經之心解律故言易不必噬嗑言詩不必行露  
而折獄速訟之義自具也言書不必呂刑言禮不必周  
官而誥四方糾萬民之義自具也是謂善於解經是謂  
善於讀經至其詩若詞之附存者則又風流蘊藉非墨  
守章句訓詁者所能道是蓋儒法兼長而不屑以一家  
自命者余於經學未著專書雖偶有所存無可問是茲

承友人之屬序以歸之且以質諸世之治申韓者

邗江杜氏四代詩存序

詩世業乃工終唐之世杜氏以詩鳴者四曰審言曰甫  
曰牧曰荀鶴牧與荀鶴非審言嫡派甫之子宗文宗武  
亦未聞以能詩名可見世業之不易承卽杜氏而已然  
也維揚之杜其爲唐杜氏滴派與否不可得而詳然其  
能詩者自明季迄今已四世矣時山大兄善承世業收  
撥遺藁合爲一集題曰邗江杜氏四代詩存竊謂祖孫  
父子家學流傳前人之以總集著者如宋三劉家集則  
煥也恕也羲仲也明長洲文氏五家詩則洪也徵明也

彭也嘉也肇祉也許者謂三劉以恕爲最五文以徵明爲最是編所存如萬翁詩云澹月照孤坐微雲生遠河萬翁子誰堂詩云髮入江樓白燈憐故國紅誰翁弟果齋詩云靜裡求放心春秋互昏曉果翁子補堂詩云萬事青燈在浮生明月知補翁子硯漁詩云把酒送夕陽春風蕩羈旅就一家而論其詩不無軒輊各拈十字已足追美審言希蹤甫牧以較荀鶴有過之無不及也荀鶴黨附朱溫其人品旣無足道卽唐風一集亦惟春宮怨一詩壓卷餘多俗格是編以萬翁爲首身處易代之際所遭與荀鶴略同而其詩云避地遠平陸湖雲望渺

茫亂離如此日風雪似他鄉華髮縈春思雄心蕩酒觴  
千時空有策無路獻君王憂世之心可與少陵嗣響其  
勝於荀鶴者又不僅以詩論也固宜其詒謀縣遠累世  
能詩有自也時山爲硯翁長子所著詠花軒藏藥亦不  
忝其家學他日彙刊成集三劉五文固難專美而維揚  
之杜直與襄陽樊川同爲望族豈非一家之盛事哉

李樊卿吳越游草序

諸城王香杜先生嘗敘樊卿之詩以山川雄秀論其詩  
境謂西北雄而東南秀樊卿兼有之尙以爲未足不憚  
奔走跋涉而爲吳越之游今樊卿自吳越歸挾二巨冊

索而讀之雄秀之氣往來紙上足與所到之山川相稱  
始信先生之論爲不妄而樊卿之游爲不虛然山川能  
爲詩人之助是說也余尙不以爲然西北山川余所遍  
歷以太行二華終南太白之欽崎崿嶺黃河汾灞之潏  
潏泱泱融非不雄且秀也及今數載迴憶舊游猶歷歷在  
目當時驅車往返足跡幾及萬里徒覺塵沙沒蹀素衣  
化緇檢視吟囊一無所得豈山川能助樊卿獨不能爲  
余助乎抑東南之山川能助人而西北或否乎蓋余與  
樊卿所遊之地不同而挾以出游之具亦異也吾聞善  
游者必於未游之先閉門却掃掩卷沈吟吞雲夢於胸

屋中丞於長沙節署以壬辰十月六日至長沙明年二  
月三日遄返客長沙凡三閱月其中晴霽之日甚少前  
雪未消後雪復作蓋幾於無日不雪矣瓊宴羣徑玉蕊  
封條其深厚且逾二三尺卽湘中父老亦所僅見陶元  
亮所謂入耳無希聲在目皓以潔可爲樸園增一詩境  
矣東坡居士見登州海市以爲心知所見皆幻影敢以  
耳目煩神工歲寒水冷天地閉爲我起蟄鞭魚龍且引  
韓昌黎開衡山雲以相比例而自詫爲神報之豐然則  
此日之雪滕六有神不知其呼封姨召屏翳寒湯谷釀  
同雲若何忙迫遂使千山傅粉萬樹塗脂以助樸園吟

興而後燠簾之奏得雪以清笠屐之裝得雪以潔他日  
歸抵羊城時當酷暑與嶺南舊舊把酒招涼談及茲遊  
之勝即可舉江天暮雪以爲宇內奇觀瀕行出所著芬  
陀羅館詩集屬爲之序其詩之裁僞親雅陶寫性靈中  
承已有定評矣予則以爲集中雖無詠雪之作而其境  
之清而不癯潔而無滓正可與謝希逸之賦雪王摩詰  
之畫雪相爲莫逆則嶺南詩人之善於詠雪者莫模罔  
若也請以此說題於簡末時道光十三年癸巳正月也

沈東堂遺詩序

沈君春庭以其弟東堂遺詩屬爲閱定東堂之歿距今

二十一年春庭思之不置手輯遺詩逢人就賃余視其  
帙製序題辭爛然滿目其所以悼東堂而慰齊令之思  
者無義不備不能復有所增益余於武陵詩人交者夥  
矣萊公泉畔往返者七皆在東堂歿後故無由識東堂  
卽春庭之名耳熟雖久見面定交才數月耳更無他說  
可以塞春庭之悲至遺詩之佳者諸君贊之審矣間有  
字句不穩意義未深則由年壽太促境界未闊無足爲  
東堂疵累更不必塗改點竄致失作者本來面目余幾  
無以應春庭之屬矣然竊於春庭思弟之情有以觸余  
懷兄之感余兄花耘之歿已四載矣自壬午夏初都門



分手後不復再見迄今回憶出都時在虎坊橋登車花  
耘佇立道傍忍淚作別其情狀宛然在目歸里後哀集  
遺詩凡千餘首旣以力薄未及梓行每開一函不忍卒  
讀今見春庭於少歿之弟偶存之作彙彙索題懃懃若  
是益以重余忘忽之責而生敬羨之心此中情緒非他  
人所及知余之所以應諄屬者亦非春庭莫能共喻也  
春庭其以此帙速付棗梨不必更煩友生題跋卽以是  
序綴於簡末而余與春庭之交亦可附見云

唐東溪宜園詩鈔序

芷江唐東溪先生余二十年前識之於長沙陳蘭莊翁

之座心知與蘭莊交者必詩人也然未見其詩前年夏  
余以試事至沅聞宜園之勝甲於郡城因便服過訪見  
池亭竹石位置甚工心已異之并得讀所著消夏吟去  
夏再至又讀所著養病諧作彼此唱酬幾無虛日知其  
詩之根柢於性情者深矣究未知其性情之所在今夏  
澈浦謫生芸帆挾所著詠史詩見訪余愛其才而惜其  
遇爲題詩卷端策其遠游四方必有以成就之者不致  
齟齬老鄉曲也時芸帆有晃州之行道過宜園東溪見  
余詩有莽莽風塵慚馬齒悠悠世俗妬蛾眉君才落拓  
余休矣更有何人共賞奇數語幾爲流涕因止其行延

爲宜園上客芸帆遂爲編次古近體詩若干卷而屬序於余余因此識東溪之爲人不僅以詩名也昌黎之知孟東野東坡之知李方叔人謂二子之名因韓蘇而著余則謂韓蘇之名亦未嘗不因二子而成也檢宜園詩內有跋龔明遠韓蜨齋僧只一詩後諸作畱連愛慕一往情深今於芸帆一見歎畱惓惓不已弔前人於蠹簡振後進於窮途其性情之流露有非古人莫能擬似者余嘗謂詩本性情人無真性情不可與言詩卽東溪之爲人可信其詩之必傳尙何俟哉千饒舌而爲一辭之贊乎然余竊有感矣芸帆出游纔跬步耳已遇知己果

能遍歷四方則余所謂成就其才如昌黎之薦士東坡  
之暗察於棘闥中者莫謂今無其人其居宜固未及而  
月卽能編次詩鈔信今傳後則余之以東野方叔望雲  
阮者亦未必無以成東溪之名也是可書也故書以爲  
是集之序

芙蓉樓唱和詩序

柳子厚謂邑有觀游卽爲政之具蓋以祛煩滌壅非有  
高明游息之所不能理難而事成况前事者後事之師  
其人已遠其蹟猶存不爲修葺而詠歌之悲獨山川失  
潤抑且取法無由雖鞅掌簿書其視以玩替政者奚異

唐詩人王少伯由江寧丞謫龍標尉小說家載其以琴  
書自隨命蒼頭拾敗葉供爨及洞蠻長跪乞詩數事僅  
與旗亭畫壁同爲風雅之宗若無意於政事者然以琴  
書自隨其嗜好可知拾葉供爨其清操可知洞蠻乞詩  
則邑中文秀之士其翕然向化又可知蓋子厚所謂清  
寧平夷恒若有餘愼慮滯志無所容入吾於少伯徵之  
矣豈僅以詩人目之哉黔邑西關外舊有芙蓉樓相傳  
爲少伯送辛漸處其地原在唐潤州今鎮江府治也蓋  
少伯丞江寧時事後人因其謫宦來此建樓存贖嘉慶  
乙亥曾石友刺史鉅知是邑由城東徙今地有詩文紀

其事地據雄渚二水之交有石屹立有樹森陳曠如奧  
如二者咸備誠觀游之勝境也見田明府宰黔三載邑  
中祠廡橋道煥然一新理事之勤近日罕有因見斯樓  
之榱棟傾歆丹漆駁侈慨然修復憑欄遠眺適足以祛  
煩滌蘊爲高明游息之所自爲七律四首以落其成又  
於重陽日招集幕僚子姪及邑人之仕隱而文秀者爲  
登高之會亦自爲五律四首邑中鈔橐傳和者凡數十  
人得詩若干首彙爲一帙將付諸梓以志一時唱和之  
盛而屬序於余余謂少伯詩意冰心玉壺明府誠足以  
當之其不以勤政而廢觀游尤得子厚所謂理達事成

爲邑民之福者豈獨青山明月寄意篇章足與古人爭能而爲時髦所宗仰已哉

胡泮香得樹軒詩存序

庚子長夏兀坐如舟學舍正爲炎歊所窘陸君海山以尺素至啟其緘有山陰胡泮香先生得樹軒詩存屬爲之序朗吟一過覺涼颼驟至煩暑頓除階下叢蘭若與之爭芳競馥因歎詩之移人性情滌我腸胃乃如是耶泮香僑寓桂林隨侍於黔之烏蒙往來湖湘間脚跟蓬轉幾無虛日交游之廣周覽之勝已於是帙得其大概其與海山交之深淺予不得知而予與泮香則無交者

也泮者卒年 十有一今閱二十寒暑矣其哲嗣能裒  
集遺稿乞香 黃君定其去畱桂林陳君手書付刻而  
海山又爲之殷勤索序予一羶僻處不能自文其身何  
能爲泮香重獨念泮香貽謀之善有子克家而二三朋  
輩必欲傳其人於身後則其生平交際必有以感人學  
業必有以服人惜予不克親炙其光儀而飫聞其馨欬  
也詩之必傳奚俟予言然予竊有不能已於言者近人  
刻集多由手定作時旣不免貪多編時又不能割愛盈  
尺累函疵累百出卽有佳語閱者不俟終篇而已倦矣  
是刻詩不及二百首版不及四十葉雖未必首首可傳



而可傳之作已絡繹紙上令人尋味無已卽有選刺之詩寄語其嗣無庸補刻矣因書是說以復海山當亦羨予却暑之方有得於甘瓜朱李之外者也

菊帆歸省圖後序

人子以養親之身出而從政勢不能乞假歸省不得已而迎養父母戀家居之樂勢不能望其子之歸省亦不得已而就養故迎養與就養皆非人情所得已及一旦欲養不待奉諱以歸始覺前此以升斗之祿易藜藿之餐而吾父母不加飽曾不若田舍之子足不出閭閻昏定晨省得以自如此吾香杜夫子於數年前已計及此

而有菊帆歸省之冊也其曰菊帆者夫子嘗和靖節詩  
百首慕其爲人因好其所好菊固靖節所好者時維九  
月則又離花正放之候勃然動歸省之思力請於上官  
上官重其才而抑其所請故歸省之願不遂使其請歸  
而竟予之以歸則南陔華黍卽菊徑之落英也北堂諷  
花卽菊畦之佳色也太翁抱晚節而終於家夫子采白  
華而潔其養無論酈泉一勺可制顏齡卽使眉壽令終  
蓼莪廢讀而有帆固無恙也三徑猶未荒也亦何致重  
栽潘縣之花遽負柴桑之約哉此歸省不能爲迫於勢  
而迎養爲不得已也今日者太翁就養而養終夫子欲

歸而歸遂雖不克趨庭介壽采菊承歡猶幸花裡板輿  
春暉健在從此晨饔進旨以菊爲陸續之懷夕膳嘗珍  
以菊爲蔡順之拾而且廬墓則松菊齊榮卽靖節之述  
祖德也教子則蘭菊競秀卽靖節之誨阿通也前此欲  
遂不遂之懷不且遂於一旦哉夫子以是冊命題者久  
矣歸期旣果先殯載塗非門弟子所宜巷歌之曰謹卽  
迫於勢而不能已之苦衷據諸冊末以識欲歸之志不  
自今日始爾

鄭雪堂經義序

雪堂余老友也以五簞將家子能文事而好談經學三

十年前余主講五溪時雪堂爲永綏守備知廳事將  
觀察紹宗也雪堂嘗從觀察受易義而以文字與余相  
切劘者凡四載厥後雪堂遷黃州都司因議苗疆利病  
張制軍映漢以所上六條達  
天聽超擢穀城叅將卽奉

諭查辦苗務省屯防經費歲以萬計旋陞竹山協副將  
挂吏議捐復任湖州協副將直鎮軍兵勇滋事以楚人  
習楚事調任寶慶用資彈壓蓋

特簡也壬寅春喫夷不靖遷處州鎮總兵官赴定海防  
禦血戰六晝夜兵單援絕冒鋒鏑死奉

詔優卹其子鼎臣以候補鹽大使投効軍門總理船勇  
得功授四品銜

賈戴花翎孫三人長次皆以國子生

賈舉人曾孫襲世職一身許國榮及後昆誠異數也雪  
堂少以世蔭從贈中丞傅公鼐平定苗疆積功甚偉而  
叙秩不顯及中年以條陳文字受

今上殊知累遷至鎮將其遭際可以無憾矣得志後不  
負所學以死報國其經濟亦可以無愧矣乃羣武人中  
往往以不學疾其能無足深怪而封疆大吏亦有以武  
官好文抑之者則又何也夫以武夫能文事而好談經

學雖無益於戎政亦何害於治體况說禮樂敦詩書之  
謂何必欲率天下之赴赴者能彎百石弓不識一丁字  
其軍政蓋可知矣今觀雪堂從事疆場從容致命使非  
十年讀書十年養氣安能如是儼然不污毅然不撓彼  
坐擁節鉞者操軍民生死之權臨事張皇進退失據獨  
不聞風而滋愧耶余與雪堂自綏陽別後一會於長沙  
一會於武昌中間以尺書通問者無虛歲鼎臣及其孫  
錫銛兄弟皆余門下士今夏道過浦陽始得哭於其靈  
及錫至長沙以所藏四書毛詩二經義謀付梓氏而乞  
余爲序余謂經學爲儒生執業童而習之白首莫覩其

底蘊卽老師宿儒非無著述不撫拾陳言墨守古訓卽矜奇好異靡所折中求其自出手眼成爲一家言者絕少雪堂於操兵練藝之餘侃侃高談在古之儒將已不數覲又能行其所學以立名成節卽使所業不精亦當信今傳後況其書具在以經解經六通四闢旣無撫拾墨守之弊又不矜奇好異貽誤後學讀羣聖人之書如出一先生之口則謂之四書義詩經義可也卽謂之六經總義亦無不可也他日

國史徵文重修四庫書目武臣而能通經學者當以雪堂爲

熙朝首選余故厯叙其出身始末及平日交情以期梓  
名簡末且以歎余之垂老無成不獨立功立德愧我故  
人卽經笥就荒亦當盡焚筆硯云爾

詩傳識名錄序

多識爲學詩之緒餘然夫子之詔小子必於興觀羣怨  
事父事君之後而後及此蓋未易爲初學道也古之以  
博雅名者如張茂先郭景純類能畱心於名物訓故之  
學究未敢從事於葩經以動植飛潛厥族有萬種類各  
別今昔異名稍有未審輒貽爾雅不熟之譏非若山海  
經博物志所載多恢竒瑰異未經人見者人亦無從質



正其是否是以難之也自陸璣詩疏陸佃埤雅始爲  
考据之濫觴踵而爲之者宋有蔡卞毛詩名物解元有  
許簾詩傳名物鈔明有毛晉陸疏廣要馮京六家詩名  
物疏國朝則有毛奇齡續詩傳烏名姚炳詩識名解  
陳大章詩傳名物集覽其書具在於烏獸草木之名固  
已箋釋大備卽一鱗一介一蟲一豸之細微瑣屑亦無  
不摻討靡遺後之學者但當涵泳乎貞淫正變之原細  
釋乎溫柔敦厚之旨至其緒餘之足以資多識者似無  
庸致力於螢窗蠹簡中矣然而經義無窮名物亦豈有  
盡安見前人之書不有譌且漏者必待後人之正而補

之乎是在善讀書者不爲古人困而後能爲後學倡黔  
士丁生友愛家多藏書又好讀書嘗以所著疑問就質  
於余於經史之可疑者幾於一字不肯放過余已心識  
其用力之勤矣今又取詩傳中鳥獸草木蟲魚彙爲一  
編詳加考訂雖未能於二陸兩毛蔡許姚陳諸書外別  
出新義而其徵引各說博而不煩間附已見質而不俚  
洵足爲發蒙之善本廣雅之新編亟宜付之剞劂以爲  
吾黨學詩之一助云

試劍餘墨序

安江廖君桐川諸城王香杜先生之詩弟子也與余爲

同門友香杜先生知黔陽時桐川嘗以詩就質亟爲所  
賞遂爲門下高弟與余神交者十年及余司鐸來黔始  
得握手訂交其時香杜先生改令隴西物故十餘年矣  
每一聚晤談及先生之言論風采未嘗不恨來黔之晚  
不及分幟吟壇與桐川共領詩教今香杜先生遺稿尙  
未刊行聞已散佚十之八九而桐川之詩則旣哀然成  
集矣集名試劍餘墨所存不多其生平游覽之勝友朋  
酬唱之情家庭睦雍之象皆可於是集得其大概謂非  
得力於名師指授其能於張弧挾矢之餘自樹一幟乎  
香杜先生分校楚闈者二余則辛巳所薦愛知最深者

也先生於諸門人中獨以詩學望余今則一壘投老百  
藝無成桐川以武科起家尙能傳先生之衣鉢行自愧  
矣猶幸所居爲先生過化之鄉得聞弦歌遺澤又得與  
桐川叙同門之雅或者假年卒學尙不至爲風雅所棄  
與讀桐川詩因題數語於簡末用以自勉且以志余與  
桐川淵源之所自云

邱述齋竹蔭軒續集序

述齋吾學中老友也余在長沙時久聞其名與哲兄覺  
吾埒及秉鐸來黔覺吾已先逝幸以沆瀣之誼得交述  
齋且讀其舊刻竹蔭軒詩集知其沈浸於六義者深矣

果不愧爲覺吾難弟余得以交述齋者續未逮之交覺  
吾雖逝揖山堂之言論風采猶不啻晨夕相接也惜述  
齋以老懶不能常遊城市與所居煙溪相距僅十餘里  
而足音楚然仍不能銜杯煮茗暢談其詩境之所獨造  
與家學之所力承正惴惴焉以失交覺吾者又將失交  
述齋爲懼適其從子文英持竹陰軒續集屬爲擇存檢  
閱數過見其年愈老而興愈邁較之舊刻益臻精遂因  
思詩人心力所至自知最明無待旁觀爲之審定余嘗  
爲其先世玉璫隱君所闢之月旆園輯有詩文鈔行世  
前二卷多寓賢名筆後一卷則邱宗人之已往者咸在

而以覺吾終焉他日繼覺吾而主是園壇坵者非述齋  
其將誰屬因書數語於簡末以見余與述齋交卽與覺  
吾交且與玉璫以下諸先德亦無不推懷送抱神交於  
二百餘年之間不僅以得見竹蔭軒詩集爲幸也

羅金淑碧芙蓉館詩序

余近歲序閨閣詩三一前室陳梅仙梅影集一兄女葆  
儀茶香閣集一今室錢之妹衡齡霜月吟之三人者皆  
秀外慧中詩有時譽而梅仙又善篆書葆儀善琴皆早  
天錢亦少寡人謂女子能詩爲不祥其言似非無據今  
閱善化羅麗笙女史碧芙蓉館詩草則又以前言爲不

然麗笙之外氏胡與余族爲戚前在長沙曾見其詩並  
聞其通星卜諸技其時尙待字深閨未及一見及余遠  
宦龍標又三年矣一日有湘陰鄒君子香赴館晃山停  
舟見訪于香丁酉拔萃知名士也詢知麗笙得爲其儷  
深以淑女得所歸爲喜子香年少多才必爲一時偉器  
則麗笙唱隨偕老之樂有非梅仙等所能及者子香去  
後以是集郵致索序檢其中有與子香論詩句云句貴  
性靈還忌滑派無唐宋祇求工知其志趣不凡不屑以  
香奩自許也又書小倉山集後云却恨阿儂生已晚春  
風吹不上湖樓知其辨香欲藝而歎目下之無師承也

誠能求工唐宋何患今無隨國余遂不辭而爲之序且以解女子能詩爲不祥之惑而梅仙等早夭而少寡者旣能以一卷長留傲庸庸而福壽之男子若麗笙之唱隨偕老遠而梁孟近而趙管不足羨也人間清福更未可量則女子能詩祥莫大焉卽以此說弁諸卷端質之于香當亦以余言爲信

作是序後逾年得子香書始知麗笙又死女子能詩爲不祥信然也噫

又記



三長物齋文略卷一終

三長物齋文略卷二

寧鄉黃本驥仲良著

集字音訓序

丙午孟春門人蔣鵠臣抱其卿先生段君所著遺書二十有四冊來謁曰君名廷諤以歲貢生閉戶著書卒於去年四月得年六十有六其子不能讀恐致遺失鵠臣慘得是槩求爲製序以存其人余閱其書皆蠅頭小楷約數十萬言名曰集字音訓蓋取坊刻十三經集字逐次詮疏一字數音一音數義或數音一義博引詳徵條分縷析卽如大學之道四字所釋已不下六千言可謂

博矣所引經史子集又復綱舉目張有條不紊其用力可謂勤矣學者誠能如此用心使所讀之書一字不肯輕易放過何患不爲通人則其造就後學之功豈有既乎第其書以四書五經及周儀二禮左公穀三傳爲次而爾雅孝經關焉蓋爲山九仞一簣未成猶爲不完本也余司鐸龍標今已十稔有如此讀書之人終老鄉曲而不及一見心竊憾之蓋其生平立品甚高足跡不入城市其鄉人又無達其姓名於余者故無由面質其體例之得失使之由博返約歸於至當爲讀經者必不可少之書是則段君之不幸亦此地讀書者之大不幸也

余猶幸獲見此彙編其寶而藏之以待後來之善讀  
書者踵而輯之以成完書刊版行世余將濡筆以俟特  
先敘其大略如此

是書余爲改編四書字詁五經字詁二書另有序此  
其原藁也

又記

### 承啟錄序

山陰李君閏甫本姓楊氏世居柯里之西其太高祖瑞  
州娶於李生子質菴出爲舅氏茂伯後遂冒姓李氏李  
氏世居柯里之東質菴出繼後茂伯復舉一子奉李氏  
祀質菴子訥齋以歸李則爲支贅歸楊則又惘然於身

所自出因別建一祠以瑞州爲楊氏祖不忘本也質菴  
以下仍姓李氏不背德也以故一楊二李族分爲三質  
菴之後與楊氏累世不婚值春秋時祀於楊氏及茂伯  
之族各舉一人入祠陪祭以繼先人親睦之意此柯里  
李氏一而二二而一之原委也閨甫以本房人衆聚散  
無常恐久而忘焉譜其世系名字生卒婚葬都爲一冊  
題曰承啟錄而以三黨姻親及受業之師濟困之友附  
列其後余謂是錄有三善焉古今冒姓者多矣當窮困  
時資其撫育謂他人父謂他人母有所不惜及名位通  
顯輒復姓歸宗不獨有背於恩養之義且使吾祖若父

所仰事而趨承者一旦遂爲路人其所以事吾祖若父者不已薄乎茂伯之族既有本房主祀則質菴子孫原可復歸楊氏而訥齋必欲聯二族爲一家至閨甫兄弟行已七十餘人矣而猶遵守不廢是其家教之厚有足以厲薄俗者善一也閨甫自弱冠後幕游江左繼客湖南去其鄉已前後二十餘年其敬宗收族之心久而不忘手訂是錄以貽後人是其敦本之篤有足以廣孝思者善二也是錄之未附及姻親及患難相卹之人尤爲近日支譜所罕見在昔人惟柳子厚於先墓碑陰附刻先友二記彷彿似此至於一字之師一飯之德必欲傳

示子孫載之譜牒是其存心之厚有足以維友誼戚誼之衰者善三也有此三善其家必昌吾願天下之冒姓者以李氏爲法天下之遠遊者以閨甫爲法天下之有姻戚師友者以閨甫是錄爲法則人心風俗不患其不日趨於厚矣豈獨爲閨甫善也乎哉

志穀備要序

羿不爲拙射變其穀率能與人以命中之道而不能與以必中之巧也然經云志正體直持弓審固何嘗不以巧與人無如世之教師不能貫通經義語焉不詳泛而不當後學之士遂以穿楊貫蝨爲古人絕藝而觀德之

學於是失傳桐川廖君本儒家者流以餘事習射得擢鄉科且以其藝授家塾子弟及鄉里後進得其傳而入武庠拔鄉幟者甚夥桐川猶以所授之未廣也因著志彀備要一編有心得歌及弓矢射法諸論其言約而賅質而便記但識字者皆能會之於心而注之於手命中之巧不待外求誠習射之秘傳也癸卯長夏携以示余余亟賞其能以淺近之言達精微之理可爲射義註疏可爲教師程式懇懇付梓以廣其傳桐川慧心人也書畫鐫刻之藝無一不精而又長於吟詠卽所撰心得歌十有五章章僅十六字固精以下十有八章短者才十



四字長者亦僅廿餘字視步天歌撼龍經醫家之方歌  
卜家之繇辭尤爲簡明易誦試取刀劍槍盾諸法逐一  
演成歌訣其用更廣現值

國家需材之際回部海疆屢以捷報誠能操練精熟攻  
堅致果何用不臧又豈僅爲鄉里教授之私錄也哉

### 湘漁詩話序

窮鄉僻壤中有老儒焉於茅簷曝背之餘粗糲飽餐之  
後執筆伸紙據案疾書所見所聞皆不出閭里之外一  
一載記而不嫌其煩自忘其倦若有程限迫之惴惴焉  
惟恐家人以米鹽瑣屑妨其工課者在村夫子固不知

所書何用卽高明士見之亦且笑其勞無益之精神而費有用之紙墨及至其人已歿遇有徵文考獻之舉而後訪至其廬於斷爛抄本中採而錄之卽一鄉文獻之所在也是說也吾於邱明經覺吾先生所輯詩話益信先生足不至通都交不遍海內麥隴桑畦垂垂以老何所得詩何從立說乃津津話之其首卷所論應制諸作原可不話卽各卷中所論

國朝詩人優劣見集未多品評難當似亦可以不話然其中徵錄過客之留題鄉人之遺稿則於文獻之道大有關係前歲議修邑志因費缺中止吾嘗輯有採訪程

式於邑人著作備列其目除向天章文煥孤雲亭一集  
外於唐明經有徵觀瀾塢集黃教諭飛遠椒麓堂集皆  
無傳本而二君之詩則先生話之卽先生傳之矣黔邑  
在全楚爲邊境風雅之材原不易覲然一邑之大歷朝  
之久豈無其人大抵沈沒於子孫之不能珍其手澤鄉  
人之不以詩教爲重第如時花好鳥過候卽無安得有  
覺吾老人於傳聞目覩之餘採而話之全集雖佚卽此  
零圭斷璧亦足以見其人之性情學問此其功德勝於  
育嬰掩骼多多矣而謂當日之不恤人言而亟爲之者  
不大有功於一鄉之文獻也哉

杯筴新編序

周易爲冒道之書自來術數家談占候者無不從易義中推測而出如揚子雲之太元經東方曼倩之靈棊經皆言之鑿鑿確有應驗故歷數千百傳而其書卒不可廢近世有所謂打大筴者其人皆游方丐食之流其言多邛野鄙瑣之說彼本不知易爲何物道爲何名故稍諳經術者賤其人並薄其術其實合而爲一分而爲兩參而爲三變而爲千化而爲萬易中之理數精蘊何嘗不賅括於陰陽奇偶之中况孟琰之製其來已久古用玉字爲琰今用竹字爲筴又荆楚歲時記作教朝野僉

載作角

校音

宋魏野詩作校皆謂今之竹筴也其術以二

筴投空擲地眊其俯仰以斷吉凶昌黎韓子大儒也亦

云手持盃琰導我擲云此最吉餘難同後之學道君子

顧可賤其人薄其術耶吾友廖君桐川精於易義研朱

玩索之餘卽物窮理出其緒論演爲杯琰新編是書旣

出當與太元靈基並傳不朽豈僅以小道可觀多能鄙

事爲無愧通明之自號也哉

桐川自號通明子

重修賈太傅祠竝建小學記

代作

長沙舊有賈太傅故宅及太傅所鑿井在縣治西北濯  
錦坊後人卽其地建祠以祀竝追祀楚大夫屈原一名

屈賈祠水經注元和郡縣志及

大清一統志記載甚著太傅事蹟見史傳而生平論定則互見於晉庾闡弔太傅辭唐戴叔倫劉長卿過故宅詩宋蘇文忠太傅論明李文正修祠記然其出傳長沙史僅載按湘賦鵬雨事而於澤及湘民千秋廟食之遺愛舉無可攷前漢廟祀之存於長沙者惟文王吳芮定王發二廟一在北關外一在東關內芮佐高帝以忠顯發築臺思母以孝著而此祠獨巋然與二廟並存非以更定法令未竟所施被謫浮湘必有小試於痛哭陳書之先者故思之深而傳之久耶去歲余蒞官來湘祇祀

先賢見是祠爲住僧所踞內則商貨囤積外則市肆障蔽棖桷傾圯丹漆駁落未稱景賢之典因攷建祠始末明成化元年始以宅基改創著於祀典至

國朝康熙二十二年重建四十年長沙通判賈仲儒置香火田九石有奇乾隆二十四年重修嘉慶二十二年前方伯翁君元圻捐春秋祭銀二百五十兩祠碑多剝蝕惟衡山侍御歐陽正煥祠田碑及長沙守劉某判刻存焉乃爲屏逐住僧拆去左右市肆籌款修祠並植欄以護舊井經始於嘉慶二十五年仲冬落成於今年孟春屬乾州丞翟聲煥釐其役又屬善化令李宗沆勘丈

祠田田在善化七都十一區民田六石有奇屯田三石  
與碑載無異歲入折租銀百四十兩又祠後隙地歲賃  
銀四十兩翁方伯捐項歲息銀四十兩屬理問瞿中溶  
總其出入除春秋祭及祠田額稅守役工食外建立小  
學二所每所課童子十人置修脯聘館師餘存藩庫爲  
葺補之需夫小學非僅爲童子計也學者立身行已務  
求實效以希有用若徒以章句訓詁弋取科名童而習  
之白首終無依據治安數策當時雖未盡用識者謂如  
其言雖三代無以遠過則湖湘人士期爲有用之學取  
太傅遺書服膺而三復之其成就定能遠到然發蒙養



三長物齋文略卷之三  
正自童子始故增立是學以廣嶽麓城南壇坫之所未  
及而太傅廟食之遺愛益永垂勿替矣

重修李中丞祠堂記

代作

前中丞李瀛仙先生以康熙五十五年巡撫湖南借帑  
發賑出穀平糶釐奸剔蠹吏泊肅然其尤彰彰者則鄉  
試分闈一事湖廣鄉試舊係合闈湖南學額與湖北等  
而赴試者不及湖北十之三中式者準此蓋以險隔洞  
庭屢遭覆溺功名之念不敵性命之虞故三年大比裹  
足不前者十常八九先是趙中丞宏恩潘中丞宗洛疏  
請分闈俱爲部議所格而先生復踵其後三疏籲懇并

捐俸刱建貢院仍格於部議不果行迨雍正元年欽奉  
俞旨於甲辰科舉行湖南鄉試湖南士子永沐

聖恩科名蔚起皆先生累疏入告剴切陳情之力也先  
生以勞瘁卒於官士紳請入主賢良祠與前巡撫趙恭  
毅公申喬合祀復建恭毅及先生專祠於城北歲久祠  
爲營卒所踞榱桷傾圯享祀弗虔庚辰秋余叨撫是邦  
恭謁各壇廟爲士民祈福見湘中廟祀類多廢弛乃次  
第新漢賈太傅及恭毅二祠復敬奠一觴於先生祠下  
懷遺愛之永垂懼薦馨之弗稱爰飭長沙謝令希閔勘  
丈祠基籌項修葺新化李令之梓先生後裔也捐銀二

百兩與通省守令公捐恭毅及先生祠經費發商生息  
又丈出祠外鋪地若干所取其賃租交布政司理問歲  
會所入爲春秋祭及香火歲修之用是役董工屬之翟  
丞聲煥楹柱朽蠹者易之丹漆駸脫者新之瞻仰輪奐  
頓復舊觀而先生之崇祀日新全省之士風益振矣湖  
南貢院原建號舍七千有奇乾隆十一年楊中丞錫紱  
以號舍湫隘拓而大之僅存五千嘉慶三年姜中丞晟  
二十四年翁方伯元圻以應試人數過多兩次增建各  
以千計合之仍符七千之數夫以未分闈不及湖北十  
之三者今且增至數倍非湖南人才昔絀而今優也文

風積而日興端賴後賢之培養士氣剝而必復實由前哲之轉移則先生廟食此邦宜其爲百世不祧之祀而後人之崇德報功潔蠲致敬以培一方文教以永千秋祀典孰有急於是舉者哉故於修葺告成謹記歲月以勒諸石

重修黔陽縣學記

代作

黔學自乾隆戊辰由西城外遷建今地近百年矣其後屢有修改規制尙未完備辛丑冬余視事之始祇謁先師仰見殿宇未宏丹雘就黯心竊悚然詢知邑士先有重修之議因爲極力贊成倡捐經費擇期於明年二

月經始及開工後余適郇事晉省以鳩工庀材託之學  
師黃君暨邑紳蔣子仲暉等八首事至八月下旬始奉  
檄回任而大工已有端緒矣加以飭匠程工按籍徵費  
禮樂器數黃君任之收掌支發仍以首事等是任至今  
年仲春丁祭始克次第告成殿制崇於舊者二丈有奇  
深廣亦增丈許戟門適與殿稱而壯偉過於舊規左右  
增建

御碑亭二座櫺星泮沼翼以石闌東西廡及名宦鄉賢  
孝義三祠皆撤舊更新煥然大備除邑紳指捐各項外  
用錢不及萬緡皆平地興工寸材片石槩未就用是則

修建之大略也抑余別有說焉邑士之亟議修學非以二十餘年科名不振故耶不知培植風水特可爲文運之助要非擢巍科掇高第之本原也乾隆甲寅嘉慶戊辰庚午等鄉科辛未己卯等會科學宮則猶是地何以甲乙榜屢以捷聞試就鄉先達而敬詢之必有所以自操其券者而後地氣得以效靈黔邑距省爲遠大比之歲列庠序者往往褰足不前近得賢父師助以資斧亦知努力前進矣而羊公之鶴種瓊如故者又何耶蓋以平日少伏案之功臨時爲掘井之計鹵莽而耘者亦鹵莽而穫矣上科桂林龍翰臣啟瑞省侍來此竟奪大魁

三  
彼僑居官廨僅三兩載尙應龍陽洲見之諺況生斯地  
者身游寶山之堂日飲清沅之水其鍾靈毓秀更當何  
如是風水原不負人要是有志者自勉耳余自去冬與  
諸生約每月會文者三會各四藝別擬百題限以場前  
完卷諸生亦踴躍從事伊吾佔畢之聲達於衢巷似此  
挾持有具韞玉待沽又值黌序新成氣象煌煒安見人  
文蔚起科第蟬聯不卽兆於今日也哉

重修佛山鎮關帝廟記

代作

道光十年歲在庚寅里人重修佛山鎮 關帝廟余旣  
爲之記其興建始末刻於麗牲之碑 帝君之威靈赫

奕護國庇民所以激忠義而厚風俗者已略具於前記  
中矣越四年癸巳冬初里人以前修未稱復捐銀二萬  
二千兩有奇重新廟貌并石臺佛閣至明年冬杪落成  
時余巡撫湖南董其事者復徵言於余余謂佛山當汾  
流之衝商賈輻輳闐闐櫛比爲吾粵巨鎮秋水時至海  
山動搖彌望皆驚湍駛浪霆擊雷轉怒噬乎石壩之趾  
必氣衰力竭然後循山而下與西北兩水合流而入於  
海故歷來居是鎮者嘗以水患爲虞而去歲甲午之水  
爲患滋大使非有靈神以捍禦之古佛以拯救之崇宮  
傑閣以鎮壓之何能使滔滔者順安瀾之性浩浩者免



懷襄之憂則是廟之修非僅爲都會壯觀直一方之保障也稽之舊碣一修於康熙辛酉再修於乾隆壬午迄今已閱七十餘年棟宇剝侈岸傾頽爰集眾議倡修前築臺礪以固其基後建層樓以表其勝有正殿以奉帝君有後殿以供佛像其左右又有迴廊夾道重門複閣以極其幽邃閣敞之致輪焉奐焉成之不日環而集者莫不愕立駭視意其爲佛土化城有鬼神焉以陰相其役且疑乎璇題貝闕一旦涌出於龍宮之表也余故樂得而再記之以諭吾鄉之好義而興斯役者

麻陽縣重修文昌閣記

代作

文昌在天爲司祿尊神在人爲孝友古哲其聰明正直  
開文運掌科名而彰輝乎善惡赫赫乎有聲洋洋乎如  
在無論通都僻邑廟貌維嚴莫不尊而奉之矣我  
朝嘉慶初仿文武二廟制於正祠後

勅建三代祠卽事人之道而寓報本之誠典至鉅也麻  
邑舊有文昌閣在城內巽方學宮之右規制精備而  
後祠未建春秋祀日卽閣隅行禮道光丙申歲余權縣  
事恭詣閣下見祀典不稱心竊未安明年丁酉正月元  
日假寐待曙夢避水至閣內欲入而無門有導之從窗  
隙入者旣入登危樓見帝君端坐其上旁置故紙堆令

檢閱隨手拾得一條帝君曰喻否此教人爲父兄訓飭子弟作好人者又曰爾歸視公署春帖卽知也及覺出署行香諦視頭門一聯曰正直代天行化慈祥爲國治民因問書吏曰此陰隲文中語何爲易救爲治而揭諸署門吏白以偶然書未細審也命亟易之然後知帝君之靈爽以閣制未備無以妥先靈何以訓後嗣署宅分內外而栖神之所不如式皆所以警迪乎守土者故於元日兆之於夢而驗之於目誠赫赫乎有聲洋洋乎如在也因商之學官朱君捐捧倡修邑紳士亦欣然樂助未及興工余移任芷江朱君亦以鄉試晉省及朱自省

歸往復札商遂毅然任鳩工庀材之役于是冬經始本年戊戌夏落成修葺傑閣創建三代祠凡三楹於閣後丹雘塗暨煥然一新是時朱君又以升階郇任走書索記因書感兆興修始末以貽邑士鑄諸麗牲之石使知帝君眷顧斯邑彰彰如是則文運之興科名之盛可翹首待也而爲舊宰者亦與有厚望焉

劉猛將軍祠記

代作

在祭法曰能禦大菑則祀之能捍大患則祀之菑患之切於民生者莫甚於蝗此捍禦之神所以必臚諸祀典也伏讀

大清會典載有元指揮使劉承忠世稱猛將軍禱蝗有驗雍正二年

勅祀於各直省府州縣而方志所載又有宋紹興名將劉錡於景定四年勅封天曹猛將有江蘇吳縣石刻可證又有謂神爲劉錡弟銳者然劉姓而以猛著昔人或有同稱要其以禱蝗通祀載在會典則當以元指揮使爲可據湖南自分省以來向無飛蝗害稼之前明偶有之亦在岳澧沅靖各邊境至長沙省會則自古未聞故驅蝗之神未設專祀去秋七月自大湖以北飛蝗蔓延及於岳郡且至於長沙幸時值收穫不至成災然其

冲其水小一出山門其水較大前邑侯曾石友刺史建  
板橋二行旅便之歲久爲春漲所圯庚子冬邑侯龍見  
田司馬倡建石工小橋甫竣所費已逾千金經費不繼  
大橋因而中止行旅之淹滯者如故是橋雖修猶未修  
也辛丑冬寶子桂軒向子仲友邱子維周共議集貲修  
復謂溪流較大筑石爲之不惟工費浩繁而且沙浮難  
固不若仍建板橋壘石爲墩長三丈許廣丈許平坦堅  
固勝於石工自去年二月起工本年正月落成所費不  
及石橋十之三四皆邑人好義者解囊樂助也而三子  
實爲之首三子皆余門下士能以利人濟物爲心卽能

以天下事自任者也是真不愧爲秀才矣余夏初有事  
安江道出此橋見溪流環折有石橋以枕洪瀾有板橋  
以通孔道高柳栖鴉天然畫境輿夫爲余頌之固已私  
心竊喜矣及歸三子適以橋堦索記因書平日之論文  
正者爲三子勉且爲及門諸生共勉焉子興氏曰堯舜  
與人同莫謂文正爲不可幾及而以鄉曲義舉爲不足  
爲則余有厚望矣